

ORANJESTAD – Un pueblo tin e derecho di wordo bon informa di un manera obhetivo y sin weganu y coloran politico of comercial.

Tal informacion normalmente ta bin di periodistanan cu a studia e profesion aki riba un nivel halto y cu semper ta dispuesto pa conta e berdad segun e investigacion cu el a haci. Normalmente un periodista of noticiario na ta acepta ningun forma di sponsor pasobra esaki ta influencia su independencia investigatorio y ta manipula su pensamiento. Tambe un periodista of noticiario ta trata di mira otro opcionnan y puntonan di bista sin acepta sin mas loke cierto persona of instancia ta vocifera. E ta dispuesto y ansioso pa semper busca e berdad y no ta kere un opinion simplemente pasobra ta trata di un hende cu kisas e conoce of cu e ta confia. Un periodista of programa noticiario ta un investigador incansabel y un persona caweta, pero nunca grosero y fastioso. Pues, e ta un persona critico y no partidista. Den nos periodismo nacional e termino critico ta wordo mira como algo negativo. Si bo ta un persona critico di biaha bo ta un enemigo y bo ta wordo negligia y insulta. Hasta si bo ta duna un critica of opinion constructivo. Un critica no ta wordo acepta door di ningun organisacion, instancia of politico riba nos isla y ta wordo mira como un atake personal. Esaki tin como consecuencia cu e periodista di biaha ta wordo insulta of ta start un proceso huridico pa di tal manera cera su boca of stop su pen critico. Lamentablemente cu no ta den e mundo di periodismo so bo ta mira e tendencia aki, sino tambe den esun di cultura, educacion y ciencia: nos no por critica un cantante cu ta canta falso, un

maestro cu ta duna les malo of un escritor cu no ta skirbi bon, pasobra di biaha bo ta wordo categorisa como un enemigo, un amigo falso. P'esey nos ta opta pa cera nos wowo y horea y haci mescos cu tur cos ta bon manera e ta.

E tarea di un periodista ta investiga, controla, analisa y raporta na su publico na un manera mas obhetivo posibel kico ta e caso y pakico loke e ta raporta ta forma parti di noticia. Noticia mayoria di biaha ta un informacion nobo, un secuencia di informacionnan of echonan informativo relaciona cu un topico. Pues, un opinion semper ta keda un fuente di informacion subhetivo y personal y ta sirbi den e mundo periodistico simplemente pa ilustra un manera di pensa y no ta un informacion obhetivo.

Den noticia na Aruba hopi biaha bo ta mira lo contrario unda e opinion di un persona (mas tanto politico) ta forma e base di un noticia y no tin ningun cuestionamento di loke ta wordo insinua of afirma. Banda di e periodista cu mester ehcuta su trabou di un manera profesional y informativo, bo tin e medianan di comunicacion cu ta transmiti e noticia, manera corant, television y emisoranan di radio. E locutor tambe ta forma parti di e team di periodismo profesional y no mester ta djis un cara cu ta lesa e noticia so. E mester ta capaz di por haci preguntanan relevante y cuestiona cierto ponencianan. Tambe e mester ta consciente cu e por perde su credibilidad si banda di ta e cara di noticia, e ta aparece den diferente programanan popular, dudoso y mediocre. Loke ta keda incomprendibel ta e manera con noticia ta wordo presenta na radio y television: e rol di e locutor ta pa introduci, elabora y con-

clui un tema noticioso, mientras cu e fragmentonan graba ta pa ilustra esaki como un ehempel. Di tal manera no tin ningun funcion pa laga e locutor bisa e mesun cos cu e fragmentonan tambe ta ilustra. Tambe ta superfluo pa pasa un fragmento graba cu ta dura mucho mas largo cu e noticia y cu no ta duna informacion relevante. E tarea di e locutor ta mucho mas cu simplemente sinta lesa via di un auto cu e y duna comentarioman chistoso. E mester tin un mente analitico y ta capaz di conclui e noticia di un forma concreto, relevante y sumario.

Nos sa cu na Aruba tin hopi medianan di informacion cu ta favorece un partido politico, un vision personal y un mundo subhetivo. Tur tin nan mesun estilo di entretene nan publico, sea di un manera sensacionalista y redashi of di un manera mas obhetivo y culto. Tambe e manera cu nan ta redacta y skirbi nan columnanan y noticianan ta diferencia den uzo di palabranan cu tin ora no ta ni existi den Papiamentu. Bo por ripara con e medianan di comunicacion ta wordo influencia door di e manera di papia di e personanan cu ta aparece tur dia riba e pantaya di television. Di tal manera e palabra 'brandweer' a wordo reemplasa pa 'bombero', 'potret' pa 'foto' y 'caminda' pa 'caretera', probablemente door cu e palabranan nobo aki ta zona mas culto, mas educa y mas fini. E tendencia actual di politiconan y otro personanan halto den nos sociedad ta e uzo di e palabra 'bezig'. Por ehempel, bo ta scucha nan bisa cu nan 'ta bezig ta traha un plan...' (mientras cu bo por djis bisa cu 'mi ta planeando...'). Kico e idea di uza e palabra 'bezig' ta encera? E ta un manera pa demostra con hopi ocupa un persona ta pasobra e ta 'bezig'? Awendia tur hende tambe ta premirando algun acontecimiento

of un resultado. Cu otro palabra nan ta djis kere cu algo lo tin un tal efecto, toch? Na Telearuba bo por a mira algun tempo pasa e rubrica di 'Videos Asombrosos' cu despues a wordo cambia pa 'Videonan Asombroso' y tanto den corant como riba television bo por mira e diferente version pa skirbi e palabra 'feliz'; hasta Gobierno (!) ta uza e palabra robes y ultimamente bo por mira esaki tambe den un propaganda (of mi mester skirbi commercial?) di Setar unda nan ta uza 'felis' manera cu esaki ta e palabra corecto. Periodistanan y noticieronan hopi biaha ta copia cierto manera di formula cu ta erroneo pero despues di tempo esaki por bira e standard den e uzo di idioma.

Pero no den e uzo di idioma so, sino tambe e pensamiento di periodistanan y noticieronan ta influencia e manera di pensa di un pueblo. Si e unico noticia cu bo por tende y lesa ta cu nos ta bibando den un paraiso y cu e gobierno ta bezig cu proyectonan cu lo engrandece nos pueblo y cu nos ta premira di tin un futuro briyante, nos mes lo kere cu esaki ta e unico berdad y nos como pueblo lo no por ta critico na nos mes y den nos manera di pensa. Nos no lo tin e curashi di critica, aunke cu esaki ta constructivo, ningun opinion of maneho den nos sociedad. Di tal manera nos lo acepta sin cuestiona cierto politica cu ta afecta nos habitat, nos medio ambiente, nos espacio natural, nos manera di pensa y nos libertad, cu ya ta asina vulnerabel.

Nos ta kere sin limite y sin cuestiona tur loke ta pasa riba nos pantaya di television. Ta bon mes cu den e deserto di noticia tin algun oasis di pensamiento critico existente riba nos isla cu ainda no a wordo tapa bou di un saus crioyo di indiferencia.